

# 廣東歷代詩僧簡介（十八）

慧光居士

## 惠林

惠林曲江鄧姓，行誼未詳。陳顥菴先生讀詩絕句云：白蓮菴下暢高風。行腳江淮舊一雄，杉月落庭庭鳥下，吟盟時引武溪蹤。作品未見。

## 曇秀

曇秀字芝上人，惠州山光寺僧，行誼未詳。陳顥菴先生讀詩絕句云：法院談詩喜琢磨。偏能滿足到東坡。山光寺下臨流句。值得扁舟一醉哦。

## 通岸 超逸 通炯

通岸字覺道，號智海，光孝寺僧，歙山書記，工詩，有棲雲菴集，見明詩綜。歐主遇自耕軒集有憶僧智海詩云玄言鑄詩卷。誦法叶鳴琴，遠公蓮社約，唱和仙城南，踰壘形如鶴，卿相存所欽，一旦粵會陷，四大從所侵，閻浮劫灰盡，王園不可尋。

采石謁李太白祠題峨嵋亭

江南雨過羣峯青。沙邊蘭漿時一停。青蓮居士不可見。千秋空有峨嵋亭。峨嵋山月還依舊。昔年曾照樽中酒。爲問騎鯨飛上天。不知更落人間否。

曹溪雜詠

爲愛溪山好。無人祇自看。萬峯青不斷。三月雪猶寒。乳鹿藏深樹。飛鳧過遠灘。興來誰與晤。長嘯碧雲端。經旬不出戶。春草任萋萋。谷靜有猿嘯。山深無馬蹄。巖懸

泉競落。雲礙路應迷。道者何多事。栽桃亦滿溪。

底事消閒日。衡茅適性靈。引泉通藥塢。滴露寫茶徑。野鳥分中食。巖花落淨瓶。最憐秋雨後。洗出數峯青。

石徑久延佇。還期逋客過。林深秋氣早。山靜月明多。勝事杳難說。幽懷其奈何。所思不可見。孤磬出煙蘿。

老衲時耕稼。爲居近給園。茅茨十畝地。煙火數家村。野飯炊晨熟。溪春入夜暄。尋常牧牛去。應不犯苗根。

超逸字修六，三水何氏，生嘉靖，卒崇禎八年乙亥，光孝寺僧，歙山大師法嗣，光孝寺志附其語錄一卷。

通炯字普光，號寄菴，南海陸氏，光孝寺僧歙山大師法嗣，崇禎十二年卒，六十二歲，見光孝寺志，寺志有引寄菴集。

陳顥菴先生讀智海修六寄海三家詩絕句：方外翩翩書記能。憂時胸次共峻嶒。可知琴酒雲涼裏。十二吟盟有此僧。峨嵋亭畔筆如飛。玄著超超帶妙機。與校前人張志道。後來居上是耶非。江山帶礪令人思。風雪搶攘雨露遲。十八吟儔聚詩卷。今猶赫赫耀鬚眉。（崇禎元年袁崇煥起爲薊遼總督。粵中名流通岸超逸通炯與陳子壯鄭瑞露黎密等共十八人爲詩贈別。此卷於濠鏡見之）橫戈原不爲侯封。法眼深悲出世雄。願洒軍持一滴水。助君汗馬奏奇功。（編者註：本段應補入第二帙德清之後）

## 幽冥

幽冥浙人，順治間駐錫南安寺，陳顥菴先生讀詩絕句云：佛頂岡頭值一哦。我詩無法亦無多。只如摘箇黃梅子。今日拈來贈彩波。

## 元覺

元覺字離幻，晚居羅浮石洞，因以爲號。本順德簡氏子，從宗公剃度，禮棲壑受圓具，徧參諸方，往來吳越，既而歸覲，宗公示寂，遂繼席主法華林。後往循州，遊羅浮，經石洞，愛其巖壑幽勝，築室居焉。陶握山云，石洞生平作詩，如行水流雲，天籟自鳴，初無容心，詩成輒自焚草，或爲識者持去，後得隻字，如獲拱璧，未易多見，今所存惟吾家所有，百不存一矣。

### 歸鼎湖作

大道原無住。斯行亦偶然。片帆懸洞口。孤棹入湖天。山色留前古。溪聲送暮年。江心應有月。松際幾時圓。世事多留難。山心誰與期。行當衰老日。況值亂離時。定水呈空色。閒雲寄所思。故交應有念。前路莫遲遲。

### 題寶積寺

亂餘山路少人行。古寺閒花滿徑生。鐵鑄眞僧重過火。土頽金像不知名。石幢有咒雲常護。香閣無基草自平。頭白樵夫頗向說。十年巖壑罷春耕。

### 送蔡伯照歸潮陽兼遊羅浮

先生歸去更何之。牢落殘年是別時。投老有心求至道。旁人何事悵臨歧。仙洲漫採長生藥。石洞應留舊日詩。歸去靈山深隱處。閒雲來往定何期。

陳顥菴先生讀石洞詩絕句：流水行雲時一吟。吟成得失無容心。湖天孤棹江月白。秋夕一燈方丈深。

## 元亮

元亮字浩則，番禺黃氏，順德寶林寺僧，遺稿未見。陳顥菴先生讀浩則詩絕句：詩思因雲馳亦馳。雲如有意笑人痴。浮屠擁護無他物。未免餘情尙在詩。

## 慧度

慧度，程鄉龍巖僧，山中逢故人云：

如何山不老。鬚髮白成銀。試問香山社。于今尙幾人。陳顥菴先生讀慧度詩絕句：山色青青人髮白。滄桑於此斬微塵。殘吟尙憶香山社。今日惟逢一故人。

## 開詞

開詞字慧弓，號石箭，順德張氏子，年十七矢志出家，禮在翁和尙於金龍精舍，二十受具，研究經律，多所發明。後赴粵西，歸至平樂卒。

### 三味潭

崖前溪迴空太險。不因吾汝豈稱奇。道心臨水淡然妙。臺石承趺眞所宜。幽鳥窺人棲樹靜。靈蛇聞法起潭漪。日斜殊欲無歸去。千載空令憶智師。

陳顥菴先生讀石箭詩絕句：幽鳥靈蛇景自森。智師芳跡已難尋。淡然三味潭前水。留得詩心印道心。

## 行敏

行敏字惺學，羅浮僧，華首臺云：

有約羅浮不易逢。偶來林下問仙踪。遙看茂樹餘千麓。初入名山第一峯。華首已非昔日會。緇流猶撞舊時鐘。浪遊欲極溪巖勝。竹杖憑須化作龍。

陳顥菴先生讀惺學詩絕句：此峯流韻最潺湲。我亦逍遙上古壇。不可無詩書竹杖。記予初步入名山。

## 傳檀

傳檀字越度，四會慶雲寺僧。曲泉尋海云：

環流激石欲如何。迢遞朝宗借道過。把斷要津堪一笑。笑君歸路尙蹉跎。

陳顥菴先生讀越度詩絕句：琢句沉吟意味多。重愁歸路尙蹉跎。看他曲水持津客。妙解仍須問達磨。

## 慧機

慧機，嘉應靈光寺僧，遊陰那詩：

象壑含清暉。晨夕朔風冷。扶杖展健步。遂上諸峯頂。翹首望雲關。恍惚散仙騁。我心如木枯。况獲茲幽境。理感興自超。不關象山靜。日暮踏下山。斜陽照孤影。叩扉聞清鐘。猛然發深省。

陳顥菴先生讀慧機詩絕句：理感通明興自超。不關山靜與雲遙。陰那翹首商量候。定有古僧慚愧招。

### 明顏 慧顯 定祖 南野

明顏，清遠峽山寺僧，峽山寺云：

曉鐘聲度白雲開。樓閣玲瓏絕點埃。林下忽聞仙犬吠。早知塵世有人來。

慧顯，峽山寺僧，半雲亭云：

寂寞山中久悟禪。無聲花雨濕經筵。忽聞松鶴雲間唳。天滿蟾光午夜圓。

定祖，峽山寺僧，瓊島云：

松關風掩白雲開。春暖壺天萬象回。花落莫隨流水去。恐教漁父問津來。

南野，峽山寺僧，宿飛來次韻云：

嶺南多勝蹟。此地最幽深。殿角空天外。風泉落石音。猿啼山有月。花笑客無心。不盡登臨興。憑高幾度吟。

陳顥菴先生讀明顏慧顯定祖南野四家詩絕句：峽山亭子半雲開。不絕人從塵世來。幾箇閒僧離亂後。猿啼花落亦殘灰。胸中樓閣各玲瓏。雨濕經筵花悟空。寧許一蟾天下白。不任萬片水流紅。

### 今承

今承行誼未詳，法性唱和詳集有今承詩三首。

陪徐司業鄭檢討論孝廉簷蔔樓雅集

又得隨高步。同登百尺樓。雲猶依遠樹。人似泛虛舟。舊館先春思。新花換旅愁。清言殊未已。多爲遠公留。

喜心公歸自靈洲

聞道鰲峯去。歸來未半旬。良朋添野興。詩思益清新。憶別已多日。猶疑在比鄰。相逢在風雅。無愧嶺南人。陳顥菴先生讀今承詩絕句：訶林僧舍倏成塵。風雅漸濡跡未溼。不識歸宗山籟意。相逢真愧嶺南人。

### 今雅

今雅字聞者，番禺人，族姓蘇。癸巳出世。戊戌登具。執侍丈室三十餘年，禪師居棲賢，往來省觀，不憚跋涉。性脫畧，不受羈紲，脫白後始知書，能強記，習靜之力也。

入嶺途中書事

誰道僧閒僧未閒。一年三度大庾關。松花餐盡饑驅去。荷葉衣單寒欲還。挂角寺邊愁落日。消陽峽裏照衰顏。秋風豈爲傷行路。只爲參師泉石間。

### 今別

今別字妙峯，江南江浦縣人，族姓關，原名天放。順治初，從南海縣令高入粵，雅相器重，亡何令解官去。荊客寓訶林，一見天老人，五體投地。求爲比丘，老人察其誠，戊子登具，偕入雷峯掩關。自待寮歷典巨職，皆能以慈攝衆。潭山有許長者延請住靜二年。尋又應柏堂李子之請。所至婦孺俱化，毘尼嚴淨，數與闍黎之選，洵高行僧也。

和王開五居士與旋公登東嶺望佗城有感

海風吹不散。斷續是烽煙。草木皆兵氣。干戈隔水天。花深源覺淺。野靜室如懸。世外憂生計。煩君濟巨川。

喜謝伯子司農入山

謝公多聞者。來叩洞山宗。竹下習禪定。池邊悟性融。硯飛芸署露。枕誤景陽鐘。盡是浮生事。蕭然物外踪。

秋夜潭上草堂與諸公待月

草堂靜掃一溪煙。溪月飛來照榻前。空性何曾知有濕。景光隨處見真圓。砌蟲寒至依人語。水鳥歸栖對客眠。當日清言讓支許。只今都覺落塵詮。